

四庫全書

子部

欽定四庫全書

子部

法苑珠林卷八十二

詳校官中書

臣沈鳳輝

檢討臣何思鈞覆勘

總校官檢討臣何思鈞

校對官主事臣陳文樞

謄錄監生臣馮堪

欽定四庫全書

法苑珠林卷八十一

唐 釋道世 撰

慈悲篇第七十四

述意部

夫含生稟氣皆有靈智蠢動翔翔咸知畏死致使菩薩
興行救濟為先諸佛出世大悲為本所以臨河羨魚不
如結網觀他受福不如行因是故將求其報莫若先興

其善貴賤等施黑白心平三寶福田四生同敬竝須臨
時救濟給引衣食罄奉握之珍徹耳目之玩捐已奉施
隨之以喜信夫篋筭以獎其意玉帛以表其誠身肉骨
髓尚不保戀况復外財寧生愛著菩薩行行亦不待索
雖心不待物而物亦空心心物兩備福智雙行矣

菩薩部

如大集經云佛言我昔為於一切衆生修菩薩行為此
法眼於諸衆生起大慈心捨己身血猶如大海與諸乞

者捨頭眼耳如毗福羅山捨鼻舌等如十突盧那捨手
脚等如毗福羅山捨皮施等可覆一閻浮提亦捨無量
象馬奴婢妻子及以王位國土城邑宮殿村落等與諸
乞者於諸佛所受持禁戒而無缺犯一一佛所無量供
養一一佛所稟受無量那由他百千法門受持讀誦善
修三昧我亦恭敬無量三乘四果聖人父母師長病苦
之者無救護者為作救護無歸依者為作歸依無趣向
者為作趣向令其安住我已如是於彼三大阿僧祇劫

慈愍一切苦惱衆生故發大堅固勇猛之心久修無上
菩提之行今於此盲冥世間無大導師儉法之時於如
是等諸衆生中發心願成阿耨多羅三藐三菩提欲於
三乘菩提令不退轉復願救度三惡衆生安置善道及
涅槃樂又雜寶藏經云爾時如來被佉陀羅刺刺其脚
足血出不止以種種藥塗不能得差諸阿羅漢於香山
中取藥塗治亦復不除十力迦葉至世尊所作是言曰
若佛如來於一切衆生有平等心於羅睺羅提婆達多

等無有異者脚血應止即時血止瘡亦平復

故知諸佛大悲於諸

含識平等無異

又四分律佛言乃往過去世時有王名曰慧燈

乃使閻浮提人若男若女能言之者皆行十善王初生時有八萬四千藏自然而出於四交道隨所求索者一切施與時天帝釋便作是念此王慧燈隨其所索一切施與將恐來世奪我坐處我今寧可往試為以無上道故施為以退轉耶即化作男子自相謂言王慧燈教我等行十惡殺生乃至邪見時諸大臣皆往白王王答言

不我先有是語令闍浮提人能行之類皆行十善不殺
生乃至不邪見我當為王是故無是語汝等今可嚴駕
象乘我欲自行教化國人天象既至王即便乘王言可
示我彼人言我教國人行十惡者彼即示王王問言慧
燈教汝行十惡耶答言實爾王復問言可有方便行十
善不答言有問言何者是耶彼答言若得成就菩薩生
食其肉飲其血乃得行十善時王慧燈作如是念我於
無始世已來經歷衆苦輪轉五道或受截手截脚耳鼻

出眼截頭竟何所益即取利刀自割股肉以器盛血授與彼人而告之曰善男子汝可食飲此肉血奉行十善時彼男子不堪王慧燈威德即沒不現忽有天帝而在前立問王言王今布施為一天下二三四天下耶為日月天帝釋魔王梵王耶王答言我布施不為天下乃至魔梵等我作意欲求無上正真一切智度未度者解未解者未得涅槃者令得涅槃度生老病死憂悲苦惱如是等者時天帝釋便作是念我今令王慧燈以此瘡死

者甚非所以當以天甘露灌其身上即便灌之瘡即平
復如故佛告瓶沙王言爾時利益衆生王者豈異人乎
即今父王白淨是也時王第一夫人者今母摩耶是時
王慧燈者即我身是我於前世教化閻浮提數人皆行
十善以是因緣故足下千輻相輪輪廓成就光明晃曜
照三千大千國土又大悲芬陀利經云佛告諸善男子
我於往昔過無量阿僧祇大劫爾時此土名無塵彌樓
厭彼大劫百歲世人蓮華香如來像法中我為閻浮提

輪王名曰無勝我及千子竝發菩提俱共出家於蓮華
香如來法中具修梵行唯有六子不欲出家不發菩提
我數教語何不出家六子即報王言我不能出家王復
問言汝等何不發菩提心彼言若能以一切闍浮提與
我等者當發菩提我聞甚喜已令一切闍浮提人住三
歸八齋又勸三乘分此闍浮提以為六分持與六子勸
以菩提我即出家具修梵行彼六王子不相和順興兵
交戰各不自寧令闍浮提極大飢饉天不降雨五穀不

成草木不生我即思惟今正是時應以身施血肉充足
捨林而去往詣中國上彰水山上立大誓願時阿須羅
宮皆悉大動彌樓傾搖海水波涌天及諸神皆悉悲泣
我時即從山上便自投身以本願故即成肉山高一由
旬縱廣正等人民鳥獸來食血肉以本願故晝夜生長
漸漸乃高一千由旬正等亦爾四邊皆有人頭悉具髮
毛眼耳鼻舌口齒彼諸人頭高聲唱言吐汝諸衆生各
隨所欲恣意取之血肉六根身得充滿從意所求三乘

之心乃至有求人天福者或有食血肉者或有取眼取耳取鼻取脣取齒取舌者以本願故尋即還復不盡不減乃至十千年中以身血肉充滿一切閻浮提人夜叉鳥獸於十千年中施眼如恒沙施血猶如四大海施已身肉若干須彌以舌施人如鐵圍山以耳施與如中彌樓山以鼻施與猶若大彌樓山我以齒施如耆闍崛山我身皮施徧娑呵剎善男子觀我於十千年中以一身命如是無量阿僧祇施以無量阿僧祇衆生無一念頃

而生悔心即立大願若我得成阿耨菩提意如是滿者
如是普捨十方恒河沙數五濁佛土中以身肉充彼衆
生恒沙大劫若我是願意不滿者令我永不見十方諸
佛不成菩提亦使令我不聞三寶三乘之聲亦使我常
處阿鼻地獄又大悲芬陀利經云佛言我憶無量劫時
此佛刹名日月明於五濁時我於此闍浮提為轉輪王
名曰燈明以善勸化一切衆生我時出遊觀園見有一
人反縛兩臂極為急切即問諸臣此人何罪諸臣答言

此誑王法豈是天民常由輸課六分輸一此人違命即
告諸臣速放斯人儲糧酥油勿苦索之臣答王言終無
有人能以善心輸王諸物所可日日給王夫人及諸眷
屬廚供所須皆從民出自非王力終不可得我時愁憂
却自思惟此之王位今當付誰我有五百子皆勸以菩
提即分此闍浮提為五百分付與諸子即捨詣林求仙
梵行南近大海優曇波羅林中坐禪食果草根用濟身
命漸漸不久得五神通爾時闍浮提有五百商人入海

採寶獲衆寶聚其中商主名曰宿王小福力故得如意
摩尼從彼寶洲多取衆寶及與摩尼始發引時海水波
涌諸龍惱亂海神啼泣中有龍仙名曰馬藏實是菩薩
以本願故生於其中彼摩訶薩擁護商客安隱度海自
還所住隨彼商客有惡羅刹恒逐於後伺求其便彼於
晝日放暴風雨使諸商人迷失徑路不知所趣極甚恐
怖發大音聲啼號悲泣求諸天神風雨神等乃至稱喚
父母所愛兒息之聲爾時我以天耳聞彼音聲即生慰

喻汝等商人勿得恐怖我當示導汝等徑路令汝安隱
至闍浮提我於爾時即以繒帛而自纏手內著油中以
火然之發至誠言我於林中三十六年遊四梵處為益
衆生故食衆果既化八萬四千諸龍夜叉令住不退轉
以是善根令我手然使此商人至闍浮提如是手然經
於七日七夜彼諸商人安隱得到即自立願如此珍寶
若我得成阿耨菩提令我得為商主採如意珠於此佛
土一切十方恒河沙數五濁空佛土中雨於衆寶一一

方中七反雨於種種衆寶隨意充足無量阿僧祇衆生
令住三乘又大丈夫論提婆菩薩說偈云

福德善大夫悲心施慧手拔貧窮淤泥不能自出者

如菩薩布施諸貧窮者皆來歸向如曠野樹行人熱時
皆往歸趣菩薩愛樂名勝得解脫若有人來語菩薩言
有乞者來菩薩歡喜即以財物而賞使者菩薩即以餘
物而與乞者歡喜愛敬求者言乞作此語時懷憐愍心
若有乞者不知菩薩體性樂施菩薩執手歡喜與語猶

如親友壞彼不知使生知想傷人見之亦復歡喜若見
乞者語言汝來欲須何等隨意而取安慰之言善來賢
者莫生恐怖我當為汝作依止處使彼乞者心得清涼
若如是施名為生人若不如是名為死人若不来者自
往施之有來求者尚捨身命況復財物若無悲心不名
為施若有悲心施即是解脫雖復大富名貧窮者富者
雖與無悲慙心雖名曰與不名施主悲慙心施是名施
主若求報施名為施者實賈之人亦可名施若求報施

果報猶尚無量況有悲心不求報施果報何可稱計若
求報施唯可自樂不能救濟徒自疲勞悲心施者能有
救濟後得果時能大利益修施者得富修定者得解脫
修悲者得無上菩提果中最勝菩薩思惟因彼乞者得
證菩提我今因施得無比樂因中施樂猶尚如是況無
上菩提如是乞者其恩甚重無以可報若以財寶不足
報恩當以無上菩提而施與之以我福故願使乞者於
將來世亦如我今成大施主得無上菩提不念恩者無

有悲心若無悲心無有行施若不施者不能濟度衆生
生死若不行施覆蔽悲心如以書石乃知真偽假使怨
家亦如親友

國王部

如佛說日明菩薩經云佛言過去闍浮提有國王名曰
智力常行佛事深信三寶時有比丘名曰至誠意常持
三昧慈哀衆生王欲見是比丘無有厭極是比丘髀上
生大惡瘡國中醫藥所不能愈王慙大悲即為淚出時

二萬夫人同時悲念於時王卧夢中有天人来語王言
若愈是比丘病者當得生人肉血飲食之即得愈矣王
寤驚悸不樂念是比丘病重乃須彼藥法所難得勅問
臣下王第一太子字曰智止白王莫悲莫愁憂之血肉
最為賤微還入齋室持刀割髀取肉及血持送與比丘
比丘得服之瘡即除愈身得安隱王聞得愈大喜悦澤
意存比丘不念子痛持是歡喜各有至心太子亦自平
復

良由行同佛心
身瘡得復也

又禰寶藏經昔有王子兄弟二人被

驅出國到曠路中糧食都盡弟即殺婦分肉與其兄嫂
嫂便食之兄得此肉藏舉不敢食之自割脚肉夫婦共
食弟婦肉盡欲得殺嫂兄言莫殺以先藏肉還與弟食
既過曠路到神仙住處採取華果以自供食弟後病亡
唯兄獨在是時王子見一被刖無手足人心生慈悲採
取華果活彼刖人王子為人少於欲事採華果去其婦
在後與刖人通以有私情深疾其夫於一日中逐夫採
華至河岸邊而語夫言取樹頭華果夫語婦言下有深

河或當墮落婦言以索繫腰我當挽索小近岸邊婦推其夫墮著河中以慈善力隨水漂去而不沒死於河下流有國王崩彼國相師推求國中誰應為王遙見水上有黃雲蓋相師占已黃雲蓋下必有神人遣人水中而往迎接立以為王王之舊婦擔彼刖人展轉乞索到王子國國人皆稱有一好婦擔一刖壻恭承孝順乃聞於王王聞是已即遣人喚來到殿前王問婦言此刖人者寔爾夫不答言實是王時語言識我不耶答言不識王

言汝識某甲不諦向王看然後慙愧王故慈心遣人養活佛言欲知王者即我身是爾時婦者旃遮婆羅門女帶木杆謗我者是爾時刖手足者今提婆達多是

故知善惡

目驗有徵

又菩薩本行經云佛告王曰過去世時此闍浮提有國名不流沙王名婆檀寧夫人字跋摩竭提時世穀貴人民飢餓加有疫病時王亦病夫人自出祠天階邊有一家夫行不在時婦產兒又無婢使產後飢虛復無有食便自念言今死墜至更無餘計自欲啗兒即便取

刀適欲殺兒心為悲感舉聲大哭爾時夫人欲還宮中聞此婦人悲聲慘切愴然憐傷便住聽之而此婦人適欲舉刀欲殺其子便自念言何忍啗其子肉作是念已便復啼哭夫人便入其舍就而問之何以啼哭欲作何等婦具答之夫人聞之心為悼愍語言莫殺其子我到宮中當送食來婦人答言夫人尊貴或復稽遲或能忘之而我今日命在呼吸不逾時節不如自啗其子以用濟命夫人問言更得餘肉食之可不答言課得濟命不

問好醜也於是夫人即便取刀自割其乳便自願言今
我以乳持用布施濟此危厄不願作輪王帝釋魔王梵
王持此功德用成無上正真之道即便持乳與此婦人
適欲舉刀更割一乳應時三千大千世界為大震動天
帝觀之見其夫人自割其乳濟其危厄時天帝釋無數
諸天即時來下住虛空中皆為悲泣住夫人前而便問
言汝今所施甚為難及求何願耶夫人答言持此功德
用求無上正真之道度脫一切衆生苦厄天帝答言汝

求此願以何為證於是夫人即時立誓我今所施功德
審諦成正覺者我乳尋當平復如故其乳尋時平復如
故天帝讚言成佛不久諸天歡喜即便現形歎夫人言
汝今所施得無悔恨以為痛耶答言我今所施用求佛
道無悔痛者令我女身變成男子立誓已訖應時變為
男子諸天讚言成佛不久是時國中衆病消除穀米豐
賤人民安樂却後王崩即拜為王人民熾盛國遂興隆
佛告王言爾時夫人者今我身是不惜身命今得成佛

大衆歡喜作禮而去

畜生部

如一切智光明仙人慈心不食肉經云佛住摩伽提國
寂滅道場彌加女村自在天寺精舍時有迦波利婆羅
門子名曰彌勒軀體金色相好具足威光無量來至佛
所時有結髮梵志五百人等遙見彌勒清淨白佛言世
尊如此童子光明無量與佛無異於何佛所初發道心
受持誰經為我解說佛告式乾梵志汝今諦聽當為汝

說乃往過去無量無邊阿僧祇劫時有世界名勝華敷
佛號彌勒恒以慈心教化一切彼佛說經名慈三昧光
大悲海雲若有聞者即得超越百億萬劫生死之罪必
得成佛時彼國中有大婆羅門名一切智光明聰慧多
智廣博衆經聞佛出世說慈三昧經即便信伏為佛弟
子發菩提心而作是言我今誦持大慈三昧經願於未
來必得成佛而號彌勒於是捨家即入深山八千歲中
少欲無事乞食自活誦持此經一心除亂時連雨不止

洪水暴漲仙人端坐不得乞食經歷七日時彼林中有
五百白兔有一兔王母子三獸見於仙人七日不食而
作是言今此仙人為佛道故不食多日命不云遠法幢
將崩法海將竭我今當為無上大法令得久住不惜身
命即告諸兔一切諸行皆悉無常衆生受身空生空死
未曾為法我今欲為一切衆生作大橋梁令法久住供
養法師爾時兔王告諸兔言我今以身欲供養法師汝
等宜當各各隨喜時諸山樹神等即積香薪以火然之

兔王母子圍繞仙人足滿七布白言大師我今為法供養尊者仙人告言汝是畜生雖有慈心何緣能辦兔白仙人我自以身供養仁者為法久住令諸衆生得饒益故作此語已即語其子汝可隨意求覓水草繫心思維正念三寶爾時兔子聞母所說跪白母言如尊所說無上大法欲供養者我亦願樂作此語已自投火中母隨後入當於菩薩捨身之時天地大動乃至色界及以諸天皆雨天華持用供養肉熟之後時山樹神白仙人言

兔王母子為供養故投身火中今肉已熟汝可食之時
彼仙人聞樹神語悲不能言以所誦經書置樹葉上又
說偈言

寧當然身破眼目不忍行殺食衆生諸佛所說慈悲經
彼經中說行慈者寧破骨髓出頭腦不忍啗肉食衆生
如佛所說食肉者此人行慈不滿足迷沒生死不成佛
時彼仙人說此偈已因發誓心願我世世不起殺想恒
不啗肉入白光明慈三昧乃至成佛制斷肉戒作此語

已自投火坑與兔并命是時天地六種震動天神力故
樹放光明金色晃曜照千國土時彼國人見此光者皆
發無上正真道心佛告式乾汝今當知爾時白兔王者
今我身是時兔兒者今羅睺羅是時誦經仙人者今此
衆中婆羅門子彌勒菩薩是時五百羣兔者今摩訶迦
葉等五百比丘是時二百五十山樹神者今舍利弗目
犍連等二百五十比丘是時千國王跋陀婆羅等者今
千菩薩是從我出世乃至樓至於其中間受法弟子得

道者是佛告式乾菩薩求法勤苦歷劫不惜身命投於火坑以身供養便得超越九百萬億劫生死之罪時式乾等五百梵志求佛出家成阿羅漢時彼仙人投火坑已生於梵世乃至成佛其食肉者犯於重禁後身生處常飲熱銅又大集經云佛言善男子過去世有一師子王住深山窟常作是念我是一切諸獸中之王力能視護一切諸獸時彼山中有二獼猴共生二子時二獼猴向師子王作如是言王若能護一切獸者我今二子以

相委付我欲餘行求覓飲食時師子王即便許可時彼
獼猴留其二子付彼獸王即捨而行是時山中有一鷲
王名曰利見師子王眠即便搏取獼猴二子處嶮而住
時王寤已即向鷲王而說偈言

我今啓請大鷲王唯願至心受我語幸見為故放捨之
莫令失信生慚耻

鷲王說偈報師子王曰

我能飛行遊虛空已過汝界心無畏若必欲護是二子

為我故應捨是身

時師子王言

我今為護是二子捨身不惜如枯草若我護身而妄語
云何得稱如說行

師子王說是偈已即至高處欲捨其身爾時驚王復說
偈言

若為他故捨身命是人即受無上樂我今施汝獼猴子
願大法王莫自害

善男子師子王者即我身是雄獼猴者即迦葉是雌獼
猴者善護比丘尼是二獼猴子者即今阿難羅睺羅是時
驚王者即舍利弗是是故為護依止者不惜身命

觀苦部

如正法念經云孔雀菩薩為諸天說若有悲心是人則
去涅槃不遠名大莊嚴於五道衆生若起悲心能破煩
惱云何地獄衆生而起悲心此諸衆生於自業所誑由
此怨家之所造作得不可喻種種苦大地獄等一百三

十六處衆生墮中地裂擘拆斷截燒煮無救無歸東西
馳走求哀自免不可得脫而起悲心則得增長無量梵
福若人利益衆生觀諸餓鬼種種飢渴自燒其身如燒
叢林四面馳走互相踢突焰火焚燒遍體熾然以求救
護無能救者此諸衆生何時當離種種苦惱是名觀鬼
而起悲心則生梵天若人觀於畜生而起悲心餓鬼之
中無量苦惱互相殺害空行水陸死法無量互相殘害
互相食啗此諸衆生何時當脫是名觀畜生苦而起悲

心若有能生如是之念則生梵天若人觀於六欲諸天而起悲心於六欲天受天之樂不可譬喻種種山谷山峯園林而受快樂既受樂已業盡還退生在苦處受大苦惱墮於地獄餓鬼畜生東西馳走迷亂無知受大苦惱是名觀天而起悲心則生梵天若人觀於人中而起悲心以種種業生於人中受苦樂果種種心性種種信解或有貧窮依視他人以自存活如是觀於五道衆生五種苦已而興悲心如是之人得勝安隱則得涅槃

又禰阿含經云爾時世尊以爪土告諸比丘於意云何
我爪上土多為大地土多比丘白佛世尊爪上土甚少
少耳其大地土無量無數不可為比佛告諸比丘如是
衆生能數數下至一彈指頃於一切衆生修習慈心有
如甲上土耳其諸衆生不能數數下至如一彈指頃於
一切衆生修習慈心者如大地土是故諸比丘常當數
數於一切衆生修習慈心又修行道地經偈云

當發行慈心念怨如善友展轉在生死悉曾為親族譬

如樹生華轉成果無異父母妻子友宗親亦如是其行
慈心者等意無憎愛不問於遠近乃應為大慈等心行
大哀乃至三界人行慈如是者其德逾梵天刀刃不能
害縣官及火怨邪鬼諸羅刹蛇虺電霹靂師子并象虎
及餘諸害利一切不敢近無能中傷者

又善見律云若住處有虎狼師子下極蟻子不得住若
蟻有窟蟻子遊行覓食驅逐別處得住又禰阿含經云
爾時世尊告諸比丘過去世時天阿修羅對陣鬪戰阿

脩羅勝諸天不如時天帝釋軍壞退散極生恐怖乘車
北馳還歸天宮須彌山下道徑叢林下有金翅鳥巢多
有金翅鳥子爾時帝釋恐車馬過踐殺鳥子告御者言
可迴車還勿殺鳥子御者白王阿修羅軍後來逐人若
迴還者為彼所困帝釋告言寧當迴還為阿脩羅殺不
以軍衆蹈殺衆生於道御者轉車南向阿脩羅軍遙見
帝釋轉乘而還謂為戰策即還退走衆大恐怖壞陣流
散歸阿修羅宮佛告諸比丘彼天帝釋於三十三天為

自在王以慈力故威力摧伏阿修羅軍亦當讚歎慈心
功德又大悲經云佛告阿難若復有人心住慈善當得
十一種功德利益何者為十一種一睡眠得安隱寤則
心歡喜二不見惡夢三人非人愛四諸天擁護五毒不
能害六刀箭不傷七火所不燒八水所不溺九常得好
衣餽饌飲食牀座卧具病瘳湯藥十得上人法十一身
壞命終得生梵天又增一阿含經云爾時世尊告諸比
丘有六凡常之力云何為六小兒以啼為力女人以瞋

為力比丘以忍為力國王以憍傲為力羅漢以精進為力諸佛以大悲為力是故比丘當念大慈悲力頌曰

能仁矜幻苦聖意愍重昏哀愚開攝受訓誘方便門法
身徧法界攝化指祇園俱銷五道縛共解四魔怨三修
祛愛馬六念靜心猿禪池澄定水覺意動聲喧慧風吹
法鼓振我無明塵常須近善友開我未曾聞

感應緣

略引
五驗

隋沙門釋慧越

唐沙門釋道積

唐沙門釋慈藏

唐縣尉盧元禮

唐元奘法師西國行傳

隋慧日道場釋慧越嶺南人住羅浮山性多汎愛慈救
蒼生栖頓幽阻虎豹無擾曾有羣獸來前因為說法虎
遂以頭枕膝越便將其鬚面情無所畏衆咸覩之化行
五嶺聲流三楚開皇末年召入慧日未歸揚州路中感

疾而卒停屍船上有若生焉夜見焰光從足而出入于頂上還從頂出而從足入竟夕不斷道俗殊歎未曾有也

唐益州福感寺釋道積蜀人誦涅槃經一部生常恒業凡欲宣述必先洗滌身穢被服淨衣然後昇座立性沈審慈仁總務諸有厲疾膿血穢氣者積皆召集為補浣衣服治療同食而不惡之時人怪問答云境無染淨淨穢由心心既不起愛憎何生以貞觀初年五月終于本

寺春秋七十時屬炎鬱屍不臭壞經停百日跏坐如初
道俗嗟異乃就身加漆興敬巴蜀

唐新羅國大僧統釋慈藏俗姓金氏新羅國人年過小
學神睿澄簡厭世高榮情欣方外獨靜行禪不避虎兇
持戒不羣慈救為先深隱山居來往絕糧便感異鳥各
銜諸果就手送與鳥於藏手同共食之時至必爾初無
乖候行感元徵罕有繼者而常懷感感慈哀含識作何
方便令免生死遂於眠寐見二丈夫曰卿在幽隱欲為

何利藏曰唯為利生乃授藏五戒訖曰可將此五戒利
益衆生又告藏曰吾從忉利天來故受汝戒因騰空滅
於是出山國中士女受戒無窮至貞觀十二年來至唐
國既至京城慈利羣生從受戒者日有千計或盲者見
道病者得愈又樂靜夏坐秦勅雲際寺安居三夏見大
鬼神其數無量帶甲持杖云將此金輦迎取慈藏復見
大神與之共鬪拒不許迎藏聞晁氣塞谷蓬救即就繩
牀通告訣別其一弟子又被鬼打幾死乃蘇藏即捨衣

鉢行僧德施又聞香氣遍滿身心神語藏曰今者不死
八十餘矣至十七年還歸本國具行佛教一同大國王
請於黃龍寺講菩薩戒本七日七夜天降甘露雲霧霽
藹覆所講堂四部驚嗟美聲彌遠因遘微疾卒於永徽
年中

右此三驗並
出高僧傳

唐范陽盧元禮貞觀末為泗州漣水縣尉曾因重病悶
絕經一日而蘇云有人引至府舍見一官人過無侍衛
元禮遂至此官人座上踞牀而坐官人目侍者令一手

提頭一手提脚擲元禮於階下良久乃起行至一別院
更進向南入一大堂中見竈數十百口其竈上有氣轟
然如雲霧直上沸聲喧雜有同數千萬人元禮仰視見
似籠盛人懸之此氣之上云是蒸罪人處元禮遂發願
大語云願代一切衆生受罪遂解衣赤體自投於釜中
因即昏然不覺有痛須臾有一沙門挽元禮出云知汝
至心乃送其歸忽如睡覺遂斷酒肉安經三四歲後卒

於洛

右此出冥
報拾遺錄

唐奘法師行傳云婆羅痾斯國內有列士池池西有三
獸塔是如來修菩薩行時燒身之處昔劫初時於此林
野有狐兔猿異類相悅時天帝釋欲驗修菩薩行者降
靈應化為一老夫謂三獸曰二三子善安隱乎無驚懼
耶曰涉豐草遊戲茂林異類同歡既安且樂老夫曰聞
二三子情厚意密忘其老弊故此遠尋今正飢乏何以
饋食曰幸少留此我躬馳訪於是同心求覓狐沿水濱
銜一鮮鯉猿於林樹採果俱來至止唯兔空還老夫謂

曰以吾觀之爾曹未和猿狐同志各能役心唯兔空返
獨無相饋以此而言誠可知也兔聞譏議謂猿狐曰多
聚樵蘇方有所作猿狐競馳銜草曳木既已蘊崇猛燄
將熾兔曰仁者我身卑劣所求難遂敢以微躬充此一
餐辭畢入火尋即致死是時老夫復帝釋身餘燼收骸
傷歎良久謂狐猿曰一何至此吾感其心不泯其迹寄
之月輪傳乎後世故彼咸言月中之兔自斯而有後人
於此建塔也

法苑珠林卷八十一

校謄

第六紙

一行豈宋南藏作敢十四行盡
北藏作盡十八行導北藏作道

音釋

實賈

賈式羊切與商同行賈也賈公戶切坐販也

髀

旁禮切股也

悸

其季切則心動也

魚厥切斷手足也

慘

七感切愁恨也

愴

初亮切悽愴也

擘

博陌切分擘也

踢

大浪切

烏感切陰雲狀

竄

初六切貌

黠

昨焦切與黠同

欽定四庫全書

法苑珠林卷八十二

唐 釋道世 撰

放生篇第七十五

述意部

蓋聞兀兀襟類莫不貪生蠢蠢迷徒咸知畏死所以失
林窮虎乃委命於廬中鍛駟驚禽遂投身於案側至如
楊生養雀寧有意於玉環孔氏放龜本無情於金印而

冥期弗爽雅報斯臻故知因果業行皎然如日且大悲
之化救苦為端宏誓之心濟生為本但五部名族皆以
列鼎相誇三布逸仁莫不鼓刀成務羣生何罪枉見刑
殘含識無憊橫逞殖醢致使怨冤不斷苦報相酬今勸
仁者同修慈行所有危怖並存放捨縱彼飛沉隨其飲
啄當使紫鱗頰尾竝相忘於江湖錦臆翠毛等逍遙於
雲漢或聽三歸而悟道何異瞽龍聞四諦而生天更同
鸚鳥共立長壽之基同招常命之果也

引證部

如梵網經云若佛子以慈心故行放生業一切男子是我父一切女人是我母我生生無不從之受生故六道衆生皆是我父母而殺而食者即殺我父母亦殺我故身一切地水是我先身一切火風是我本體故常行放生生生受生若見世人殺畜生時應方便救護解其苦難常教化講說菩薩戒救度衆生若父母兄弟死亡之日請法師講菩薩戒經律追福資其亡者得見諸佛生

人天上若不爾者犯輕垢罪又僧祇律云一切道俗七衆等竝須漉水飲用若漉得水已使能見掌中細文者審悉看之看時如大象載竹車廻頃知無應用使可信者教漉不可信者自漉得蟲還送本取水來處安之若來處遠近有池井七日不消者以蟲著中若知水有蟲不得持毚繩借人若池江水有蟲得唱云此水有蟲若問者答云長者自看若知友同師者語言此水有蟲當漉水用文十誦律有二比丘未曾見佛從比遠道共往

舍衛奉見世尊道中渴乏值有蟲水破戒者言可共飲
之持戒者言水中有蟲何可得飲破戒者言我若不飲
必當渴死不得見佛便飲而去持戒者慎護戒故不飲
遂渴乏死即生三十三天身得具足先到佛所頭面禮
足佛為說法得法眼淨受三歸畢還歸天上時飲水者
後到佛所佛為四衆說法即披衣示金色身汝癡人欲
看我肉身何為不如持戒者先見我法身智慧之身佛
言從今已去比丘若行二十里外無漉水囊犯罪若自

無同意伴有者聽去又有征行軍人有比丘尼教化行
人人皆弓頭安漉囊持用漉水官人聞秦國王王聞瞋
之皆欲殺却汝小蟲尚畏不殺况見賊肯害之行人向
王分疎云小蟲若於國有害臣皆殺却既無有怨何故
不聽漉飲王聞放之由行人義慈善根力及賊皆來投
化又正法念經云經宿之水若不細觀恐生細蟲若不
漉治不飲不用是名細持不殺戒又智度論云過去世
時人民多病黃白痿熟菩薩爾時身為赤魚自以為其

肉施諸病人以救其疾又昔菩薩作一鳥身在林中住見有一人入於溪水非人行處為水神所胃著不可解若能至香山取一藥草著其胃上繩即爛壞人得脫去菩薩宿世作如是等無量本生多有所濟名本生經又十誦律云佛言過去世時近雪山下有鹿王名曰威德作五百鹿王時有獵師安穀施胃鹿王前行右腳墮毛胃中鹿王心念若我現相則諸鹿不敢食穀須啗穀盡爾乃現脚相時鹿皆去唯一女鹿住便說偈言

大王當知是羅師來願勤方便出是胃去

爾時鹿王以偈答言

我勤方便力勢已盡毛胃急轉不能得出

女鹿見獵師到已向說偈言

汝以利刀先殺我身然後願放鹿王令去

獵師聞之生憐愍心以偈答言

我終不殺汝亦不殺鹿王放汝及鹿王隨意之所去

獵師即時解放鹿王佛言昔鹿王者今我身是五百鹿者

五百比丘是時有鴈王獵者得之有同伴鴈欲代捨命
還說偈相報獵師見愍二鴈竝放後求寶報恩大意同
前又智度論王聞鹿言即從座起而說偈言

我實是畜生名曰人頭鹿汝雖是鹿身名為鹿頭人以
理而言之非以形為人若能有慈悲雖獸實是人我從
今日始不食一切肉我以無畏施且可安汝意

又善見律云目連為阿育王演本生經云大王往昔有
一鷓鴣鳥為人籠繫在地愁怖便大鳴喚同類雲集為

人所殺鷓鴣問道人云我有罪不道人答云汝鳴聲時有殺心不鷓鴣鳥言我鳴命伴來無殺心也道人即答若無殺心汝無罪心也而說偈言

不同業而觸不同心而起善人攝心住罪不橫加汝又僧祇律云佛告諸比丘過去世時香山中有仙人住處去山不遠有一池水時水中有一鼈出池水食食已向日張口而眠時香山中有諸獼猴入池飲水已上岸見此鼈張口而眠時獼猴便作媼法即以身生內鼈口

中鼈覺合口藏六甲裏如故所說偈言

愚癡人執相猶如鼈所啗失守摩羅捉非斧則不離

時鼈急促獼猴即行欲入水獼猴急怖便作是念若我
入水必死無疑然苦痛力弱任鼈迴轉流離牽曳遇值
嶮處鼈時仰卧是時獼猴兩手抱鼈作是念言誰當為
我脫此苦難獼猴曾知仙人住處彼當救我便抱此鼈
向彼處去仙人遙見便作是念咄哉異事念是獼猴為
作何等欲戲弄耶獼猴故言婆羅門是何等寶物滿鉢

持來得何等信而來向我爾時獼猴即說偈言

我愚癡獼猴無辜觸惱他救厄者賢士命急在不久今日婆羅門若不救我者須臾斷身生困厄還山林

爾時仙人以偈答言

我令汝得脫還於山林中恐汝獼猴法故態還復生爾時彼仙人為說往昔事鼈汝宿命時曾號字迦葉獼猴過去世號憍陳如已作媼欲行字今可斷因緣迦葉放憍陳令還山林去

鼈聞是語便放猴去頌曰

普親皆眷屬隔世即相欺但求現在樂不知來苦資牽
我入三塗楚痛受萬危自非慈放捨何得命延時

感應緣

略引
一驗

唐魏郡馬嘉運以貞觀六年正月居家日晚出大門忽
見兩人各捉馬一疋先在門外樹下立嘉運問是何人
答云東海公使迎馬生耳嘉運素有學識知名州里每
臺使及四方貴客多請見之及見聞名弗須怪也謂使

者曰吾無馬使者曰進馬以此迎馬生嘉運即於樹下上馬而去其處倒卧於樹下也俄至一官曹將入大門有男女數十人門外如訟者有一婦人先與運相識是同郡張公瑾妾姓元氏手執一紙文書迎謂嘉運曰馬生尚相識不昔張總管交遊每數相見總管無狀非理殺我我訴天曹於今三年為王天主教護公瑾故常見抑今乃得申官已追之不久將至疑我獨見枉害馬生耶亦來耶嘉運先知元氏被殺及見方自知死使者引

入門門者曰公眠未可謁宜可就霍司刑處坐嘉運見
司刑乃益州行臺郎中霍璋也見嘉運延坐曰此府記
室官缺東海公聞君才學欲屈為此官耳嘉運曰貧守
妻子不願為官得免幸甚璋曰若不能作自陳無學吾
當有相識可舉令作俄有人來云公眠已起引嘉運入
見一人在廳事坐肥短黑色呼嘉運前謂曰聞君才學
欲屈為記室耳能為之乎嘉運拜謝曰幸甚但鄙夫田
野頗以經業教授後生不足以當記室之任耳公曰識

霍璋不答曰識之因使召璋問以嘉運才術璋曰平生知其經學不見作文章公曰誰有文章者嘉運曰有陳子良者解文章公曰放馬生歸即命追于子良嘉運辭去璋與之別倩君語我家狗吾臨終語汝賣我所乘作浮圖汝却賣馬自費速如我教造浮圖所云我家狗者謂其長子嘉運因問向見張公瑾妾所言天主者救公瑾故得至今今似不免矣言畢而別遣使者送嘉運至一小澀道指命由此路歸嘉運具言之其年七月綿州

人姓陳名子良暴死經宿而蘇自言見東海公欲用為
記室辭不識文字別有吳人陳子良卒公瑾亦亡但二
人亡後嘉運嘗與人同行於路忽若見官府者嘉運色
憂怖唯趨走頃之乃定同侶問之答曰而見東海公使
人云欲往益州追人仍說陳子良極訴君霍司刑為君
被誚讓君幾不免賴君贖生之福故得免也初嘉運在
蜀之日將殃池取魚嘉運時為人講書得絹數十疋因
買池魚贖生謂此也至貞觀中車駕在九成宮聞之使

中書侍郎岑文本就問其事文本錄以奏云爾嘉運後

為國子博士卒官

右此一驗
出冥報記

救厄篇第七十六

述意部

夫慈悲宏力之施祈福紓患之請誠至可感列聖同然
而觀世大士獨見褒聞是以投火有必糜之軀漂海無
或生之命但瞬息之頃言念歸向則洪海可竭烈火飛
涼或臨刀項上白刃不傷或墜墮深坑全身無損或枷

禁桎梏散誕形軀如是得力備鑒難盡若懇誠克己必
感靈徵若浮漫墮情艱危叵救也

菩薩部

如僧伽羅刹經云時有菩薩在山慈心端坐思惟不動
鳥孺頂上後覺鳥在頂懼卵墜落身不移搖撿坐而行
彼處不動及鳥生翅但未能飛終不捨去又彌勒所問
本願經云佛言阿難我本求道時勤苦無數過去世時
有王太子號曰寶華端正姝好從園觀出道見一人身

患病癩見問病人以何等藥可療卿病病者答曰得王
身髓血等以塗我身其病乃愈太子聞已即自破身骨
髓血等以與病者至心施與意無悔恨其王太子者即
我身是四大海水尚可斟量我身骨髓血等不可稱數
求正覺故又大集經云爾時曠野菩薩現為鬼身散脂
菩薩現為鹿身慧炬菩薩現獼猴身離愛菩薩現羖羊
身盡漏菩薩現鵝王身如是五百諸菩薩等各各現受
種種諸身其身悉出大香光明一一菩薩手執燈明為

供養十方諸佛從七佛已來與如是佛同為眷屬受持
五戒發菩提心為欲調伏一切衆生令發菩提故受此
身又禪寶藏經云昔者有一羅漢道人畜一沙彌知此
沙彌却後七日必當命終與假歸家至七日頭勅使還
來沙彌辭師即便歸去於其道中見衆蟻子隨水漂流
命將欲絕生慈悲心自脫袈裟盛土堰水而取蟻子置
高燥處遂悉得活至七日頭還歸師所師甚怪之尋即
入定以天眼觀知其更無餘福得爾以救蟻子因緣之

故七日不死得延命長

又治故塔亦得延命又治補
伽藍牆壁泥孔亦得延命也

流水部

如金光明經云爾時流水長者子於天自在光王國內
治一切衆生患令得平復時長者子有妻名曰水空龍
藏而生二子一名水空二名水藏時長者子將是二子
次第遊行到一大空澤中見諸禽獸多食肉血一向馳
奔長者念言是諸禽獸何因緣故一向馳走時長者子
遂便隨逐見有一池其水枯涸於其池中多有諸魚長

者見魚生大悲心時有樹神示現半身作如是言善哉
男子此魚可愍汝可與水是故號汝名為流水長者問
神此魚頭數為有幾所樹神答言其數具足足滿十千
爾時流水聞是數已倍生悲心時此空池為日所曝是
十千魚將入死門是時長者四方求水了不能得見有
大樹尋取枝葉還到池上與作蔭涼作蔭涼已復更疾
走遠至餘處見一大河名曰水生有諸惡人為捕此魚
決棄其水不令下過然其決處懸險難補時長者子速

至王所說其因緣唯願大王借二十大象令得負水濟彼魚命爾時大王即勅大臣速疾供給自至殿中隨意選取是時流水及其二子將二十大象從治城人借索皮囊至彼上流決處盛水象負馳疾至空澤池瀉置池中水遂彌滿時長者子於池四邊彷徨而行是魚亦隨循岸而行時長者子復作是念是魚何緣隨我而行必為飢火所惱從我求食爾時流水告子至家啓其祖父家中可食之物悉載象上急速來還爾時二子如父教

敕至家啓祖說如上事爾時二子收食載象還至父所
長者心喜從子取食散著池中與魚食已令其飽滿復
思經中若有衆生臨命終時得聞寶勝如來名號即生
天上即便入水作如是言南無過去寶勝如來十號名
字復為是魚解說如是甚深妙法十二因緣爾時流水
及子還家復於後時賓客醉卧爾時其地卒大震動時
十千魚同日命終即生忉利天既生天已思念報恩爾
時十千天子從忉利天下至長者家時長者子在樓上

睡是十千天子以十千真珠天妙璎珞置其頭邊復以
十千置其足邊復以十千置右脇邊復以十千置左脇
邊雨曼陀羅華摩訶曼陀羅華積至于膝種種天樂出
妙音聲闍浮提中有睡眠者皆悉覺悟流水長者亦從
睡眠是十千天子於空遊行於王國內皆雨天華復至
池澤復雨天華便從此沒還忉利宮

商主部

如大悲經云佛告阿難過去之世有大商主為採寶故

將諸商人入於大海彼所乘船衆寶悉滿至海中間其
船卒壞時彼商人心懷怖畏極生憂惱其中或有得船
板者或有浮者有命終者我於爾時作彼商主在大海
中用以浮囊安隱而度時有五人呼商主言大士商主
唯願惠施我等無畏說是語已爾時商主即告之言諸
丈夫勿生怖畏我今汝等從此大海安隱得度阿難彼
時商主身帶利劍而作是念大海之法不居死屍如其
我今自捨身命此諸商人必能得度大海之難作是念

已即喚商人置己身上令善捉持彼諸商人有騎背者
有挹肩者有捉腔者爾時商主為欲施彼無怖畏故大
悲熏心起大勇猛即以利劍斷己命根速取命終時大
海漂其死屍置之岸上時五商人便得度海安隱受樂
平吉無難還闔浮提阿難彼時商主豈異人乎我身是
也五商人者今五比丘是也是五比丘昔於大海而得
度脫今復於此生死大海而得度脫安置無畏涅槃彼
岸

獸王部

如大智度論云乃往過去無量阿僧祇劫有大林樹多諸禽獸野火來燒三邊俱起唯有一邊而躡一水衆獸窮逼逃命無地佛言我於爾時為大身多力鹿以前脚跨一岸以後脚躡一岸令衆獸蹈背上而度皮肉盡壞以慈悲力忍之至死最後一兔來氣力已喘自強努力忍令得過過已脊折墮水而死如是久有非但今也前得度者今諸弟子是最後一兔須跋陀是佛世世樂行

精進今猶不息又賢愚經云佛過去久遠世時時世飢
儉如來因地慈救衆生作大魚身長五百由旬國人須
其肉者無問人畜皆來取噉取已還生經於十二年施
其肉血又受生經云昔者菩薩曾為鼈王生長大海化
諸同類子民羣庶皆修仁德王自奉行慈悲救護愍於
衆生如母愛子其海深長邊際艱險而悉周至靡不更
歷於時鼈王出於海外在邊卧息積有日月其甲堅躁
猶如陸地賈人遠來因止其上破薪然火炊煮飯食繫

其牛馬車乘載石皆著其上鼈王欲趣入水畏墮不仁
適欲強忍痛不可勝便設權計入淺水處除滅火毒不
危衆賈衆賈恐怖謂潮卒漲悲哀呼嗟歸命諸天唯見
救濟鼈王心益慙之因報賈人曰慎莫恐怖吾被火焚
故捨入水欲令痛息今當相安終不相危衆賈聞之知
有活望俱時發聲言南無佛鼈興大慈還負衆賈移在
岸邊衆人得脫靡不歡喜遙稱鼈王而歎其德尊當為
橋梁多所度行為大舟航超越三界設得佛道當復救

脫生死之厄。鼈王報曰。善哉。善哉。當如來言。冬自別去。
佛言。時鼈王者。我身是也。五百賈人者。今五百弟子。舍
利弗等是也。又正法念經云。若有衆生。見犯法者。應受
死苦。以財贖命。令其得脫。不求恩報。命終生常歡喜。天
從天退還。得受人身。不遭王難。若有衆生。持戒見大火。
起。焚燒衆生。以水滅火。救諸衆生。命終生行道。天受種
種樂。又如度狗子經說。昔有一國。穀米涌貴。人民飢餓。
時有沙門。入城分衛。周徧門室。無所一獲。次至長者大。

豪貴門得麤惡飯適欲出城門中逢一射獵屠兒抱一
狗子持歸欲殺見沙門歡喜前為作禮沙門咒願老壽
長生沙門知有狗子疑欲殺之故問其人今何所齋答曰
空行無所獲持沙門又問吾已見之何為藏匿殺生之
罪甚為不善願持我食貿此狗子令命得濟卿福無量
其人答曰不能相與我故行求家門共食卿此小飯
何所足乎沙門殷勤曉喻請之其人舐突不肯隨言沙
門又言設不肯者可以示我其人即出以示沙門沙門

舉飯以飼狗子以手摩拔咒願淚出卿罪所致得是犬
身不得自在見殺食啗使爾世世罪滅福生離狗子身
得生為人所在遇法三寶自然狗子得食善心生焉踊
躍歡喜知自歸依人將還家屠殺共食狗子命過即生
豪貴大長者家適生墮地便有慈心時彼沙門分衛次
到長者門裏分衛時長者子見彼沙門憶識本緣便前
稽首禮沙門足請前供養百味飲食前白父母言今我
欲逐此大和尚奉受經戒為作弟子父母愛重不肯聽

之我今一門有汝一子當以續後家門之主何因便欲
棄家而去小兒啼泣不肯飲食不欲聽我便自就死父
母見然便聽令去隨師學道除去鬚髮被三法衣諷誦
佛經深解其義便得三昧立不退轉開化一切發大道
意佛世難值經道難聞能與相值無不蒙度畜生尚有
得道豈況於人寧不獲果縱復缺犯還生慚愧白淨已
來黑垢自滅又禰阿含經云爾時世尊告諸比丘過去
世時有一鳥名曰羅婆為鷹所捉飛騰虛空於空鳴喚

言我不自覺忽遭此難我坐捨離父母境界而遊他處
故遭此難如何今日為他所困不得自在鷹語羅婆汝
當何處自有境界而得自在羅婆答言我於田耕壠中
自有境界足免諸難是為我家父母境界鷹於羅婆起
憍慢言放汝令去還耕壠中能得脫不於是羅婆得脫
鷹爪還到耕壠大塊之下安住止處然復於塊上欲與
鷹鬪鷹則大怒彼是小鳥敢與我鬪瞋恚極盛峻飛直
搏於是羅婆入於塊下鷹鳥飛勢臆衝堅塊碎身即死

時羅婆鳥深伏塊下仰說偈言

鷹鳥用力來羅婆依自塊乘瞋猛威力致禍碎其身我
具足通達依於自境界伏怨心隨喜自觀欣其力設汝
有凶愚百千龍象力不如我智慧十六分之一觀我智
勝殊摧滅於蒼鷹

頌曰

含識皆畏死有命懼嶮危如魚困池涸難逢流水希親
疎皆父母何得輒相欺慈悲救危苦福報自然隨

欽定四庫全書

卷八十二

感應緣

略引一
十五驗

秦沙門釋道固

晉居士呂竦

晉居士徐榮

晉居士張崇

晉將軍王懿

晉嚴猛婦

晉周子長

宋沙門竺惠慶

宋沙門釋曇無竭

宋沙門釋法進

周沙門釋惠瑱

周沙門釋僧實

陳沙門釋惠布

唐沙門釋智聰

唐居士徐善才

秦沙門釋道固鄉里氏族已載前記秦姚宏始十八年師道懿遣至河南霍山採鍾乳與同學道朗等四人共行持炬探穴八且三里遇一深流橫木而過固最先濟後輩墜木而死時火又滅冥然昏闇固生念已盡慟哭而已猶故一心呼觀世音誓願若蒙出路供百人會表報威神經一宿而見小光烟然狀若熒火儵忽之間穴中盡明於是見路得出巖下由此信悟彌深屢覩靈異元嘉十九年臨川康王作鎮廣陵請固供養其年九月

於西齋中作十日觀世音齋已得九日夜四更盡衆僧
皆眠因起禮拜還欲坐禪忽見四壁有無數沙門悉半
身出見一佛螺髻分明了了有一長人著平上幘箋布
袴褶手把長刀貌極雄異捻香授道因道因時不肯受
壁中沙門語云因公可為受香以覆護主人俄而霍然
無所復見當爾之時都不見衆會諸僧唯覩所置釋迦
文行像而已

晉呂疎字茂高兗州人也寓居始豐其縣南溪流急岸

峭迴曲如縈又多巨石白日行者猶懷危懼竦自說其
父嘗行溪中去家十許里日向暮天忽風雨晦冥如漆
不復知東西自分覆溺唯歸心觀世音且誦且念須臾
有火光來岸如人捉炬者照見溪中了了遙得歸家火
常在前導去船十餘步竦後與郝嘉賓周旋郝所傳說
晉徐榮者瑯琊人嘗至東陽還經定山舟人不慣誤墮
洄復中游舞濤波垂欲沉沒榮無復計唯至心呼觀世
音斯須間如有數十人齊力引船者踊出腹中還得平

流沿江還下日已向暮天大陰閣風雨甚駛不知所向而濤浪轉盛榮誦經不輟口有頃望見山頭有火光赫然迴拖趣之竟得還浦舉船安隱既至亦不復見光同旅異之疑非人火明旦問浦中人昨夜山上是何火光衆皆愕然曰昨風雨如此豈如有火理吾等竝不見然後了其為神光矣榮後為會稽府督護謝敷聞其自說如此時與榮同船者有沙門支道蘊謹篤士也具其事後為傅亮言之與榮所說同

晉張崇京兆杜陵人也少奉法晉太元中苻堅既敗長安百姓有千餘家南走歸晉為鎮戍所拘謂為游寇殺其男丁虜其子女崇與同等五人手腳其械銜身掘坑埋築至腰各相去二十步明日將馳馬射之以為娛樂崇慮望窮盡唯潔心專念觀世音夜中械忽自破上得離身因是便走遂得免脫崇既脚痛同尋路經一寺乃復稱觀世音名至心禮拜以一石置前發誓願言今欲過江東訴亂晉帝理此冤寃救其妻息若心願獲果此石

當分為二崇禮拜已石即破焉崇遂至京師發白虎樽具列寃氏帝乃悉加宥已為人所略賣者皆為編戶智生道人目所親見

晉王懿字仲德太原人也守車騎將軍世信奉法父苗苻堅時為中山太守為丁零所害仲德與兄元德携母南歸登陟峭嶮飢疲絕糧無復餘計唯歸心三寶忽見一童子牽青牛見懿等飢各乞一飯因忽不見時積雨大水懿前望浩然不知何處為淺可得揭躡俄有一白

狼旋繞其前過水而反似若引導如此者三於是逐狼而渡水纔至膝俄得陸路南歸晉帝後自王兵尚書為徐州刺史嘗欲設齋宿昔灑埽敷陳香華盛列經像忽聞法堂有經唄聲清婉流暢懿遽往觀見有五沙門在佛坐前威容偉異神儀秀出懿知非凡僧心甚歡敬沙門迴相瞻眄意若依然音旨未交忽而竦身飛空而去親表賓僚見者甚衆咸悉欣躍倍增信悟

右此四驗
出冥祥記

晉時會稽嚴猛婦出採薪為虎所害後亡猛行至蒿中

忽見云君今日行必遭不善我當相勉也既而俱前忽逢一虎跳踉向猛婦舉手指虎狀而遮護須臾有二胡人荷戟而過婦因指之虎即擊胡壻得免也

右此一驗
出異苑錄

晉周子長僑居武昌五丈涌東垆頭咸康三年子長至寒溪浦中愁家家去五丈數里合暮還五丈未達減一里許先是空垆忽見四市瓦屋當道門卒便捉子長頭子長曰我是佛弟子何故捉我吏問曰若是佛弟子能經唄不子長先能誦四天王及鹿子經便為誦之三四

過捉故不置知是鬼便罵之曰武昌癡鬼語汝我是佛
弟子為汝誦經數偈故不放人也捉者便放不復見屋
鬼故遂之過家門前鬼遮不得入門亦不得作聲而心
將鬼至寒溪寺中過子長便擒鬼曾復罵曰武昌癡鬼
今當將汝至寺中和尚前了之鬼亦擒子長曾相拖度
五大塘西行後諸鬼謂捉者曰放為西將牽我入寺中
捉者已放子長故復語後者曰寺中正有道人輩乃未
肯畏之後一鬼小語曰汝近城東看道人面何以得故

便共大笑子長次達家三更盡

右一驗出
靈鬼志

宋沙門竺惠慶廣陵人也經行修明元嘉十二年荆揚大水川陵如一惠慶將入廬山船至小而暴風忽起同旅已得依浦唯惠慶船未及得泊飄颻中江風疾浪涌靜待淪覆慶正心端念誦觀世音經洲際之人望見其船迎颺截流如有數十人牽挽之者逕到上岸一舫全濟宋元嘉初中有黃龍沙彌曇無竭者誦觀世音經淨修苦行與諸徒屬二十五人往尋佛國備經荒儉貞志彌

堅既達天竺舍衛路逢山象一羣竭齋經誦念稱名歸
命有師子從林中出象驚奔走後有野牛一羣鳴吼而
來將欲加害竭又如初歸命有大鷲飛來牛便驚散遂

得尅免

右此二驗
出冥祥記

宋高昌有釋法進或曰道進姓唐涼州張掖人幼而精
苦習讀有超邁之德為沮渠蒙遜所重遜卒子景環為
胡寇所破問進曰今欲轉掠高昌為可尅不進曰必捷
但憂災餓耳迴軍即定後三年景環卒弟安周續立是

歲飢荒死者無限周既事進進屢從求乞以賑貧餓國
蓄稍竭進不復求乃淨洗浴取刀鹽至深窮窟餓人所
聚之處次第授以三歸便掛衣鉢著樹投身餓者前云
施汝共食衆雖飢困猶義不忍受進即自割肉挂鹽以
啖之兩股肉盡心悶不能自割因語餓人云汝取我皮
肉猶足數日若王使來必當將去但取藏之餓者悲悼
無能取者須臾弟子來至王人復到舉國奔赴號叫相
屬因舉之還宮周勅以三百斛麥以施飢者別發倉廩

以賑貧民至明晨乃絕出城北闔維之煙焰衝天七日乃歇屍骸都盡唯舌不爛即於其處起塔三層樹碑于

右

右此一驗出
梁高僧傳

周上黨元開府寺釋惠瑱不知氏族奉律貞確禪懺為業會周建德六年國滅三寶瑱抱持經像隱于深山遇賊欲劫初未覺也忽見一人形長丈餘美貌鬚顏具好衣服乘白馬朱駿自山頂來徑至瑱前下馬而謂曰今夜賊至師可急避瑱居懸崖之下絕無餘道疑是山神

乃曰今佛法毀滅貧道容身無地故來依投檀越今有賊
來正可於此取死更何逃竄神曰師既遠投弟子弟子
亦能護師正爾住此遂失所在當夜忽降大雪可深丈
餘雪深道隔遂免賊難後晴路開羣賊重來神遂告山
下諸村曰賊欲劫瑱師汝等急往共救乃各嚴器械入
山拒擊賊便驚散從此每日瑱恒憑神力安業山阜不
測其終

周京師大追遠寺釋僧實俗姓程咸陽靈武人也幼懷

雅亮清卓不羣魏孝文大和末年從京至洛因遇勒那
三藏授以禪法三學雖通偏以九次調心故得定水清
澄禪林榮蔚於是陶化京華久而逾盛忽於一日正午
僧寢之時自上樓鳴鐘急衆僧出房怪問所以實告僧
曰人各速備香火急赴集堂僧既集已又告僧曰人各
用心修理佛事齊誦觀音以救江南梁國其寺講堂欲
崩恐損道俗宜共救厄當爾之時揚都講堂正論法集
道俗向千充滿其中忽聞西北異種香煙及空中經聲

伎樂雲屯從堂北門而入直出南門合堂驚出靴履忘
著共逐聽聲人既出盡堂欵摧倒大衆得全免斯危難
奏聞梁主勅使問周果如實救梁主三度奉請周主不
放梁主遙禮備盡致敬大送珍寶及樹皮納三衣机拂
什物等禪師餘物竝皆散施唯留納机等見在禪林寺
僧互掌之以保定三年七月十八日卒於大追遠寺春
秋八十有八朝野驚嗟人天變色哀慟二國遺墳現在
苑內

陳攝山栖霞寺沙門惠布俗姓郝廣陵人少懷遠操性
度虛梗志行罕儔為君王所重或見諸人樂生西方者
告云方土乃淨非吾願也如今所祈化度衆生如何在
蓮華中十劫受樂未若三塗處苦救濟也年至七十與
衆別云布命更至三五年在但老困不能行道住世何
益常願生邊地無三寶處為作佛事去也幸願好住願
自努力於是絕穀不食命將欲斷下勅令醫證之縮臂
不許沈皇后欲傳香信又亦不許臨遺訣曰長生不喜

夕死無憂以生無所生滅無所滅故也未終前大地連動七日便卒移屍就林山地又動太史奏云得道之人星滅矣時以當之初將逝時告衆前云昨夜有二菩薩來迎一是生身一是法身吾已許之尋有諸天又來迎接以不願生故不許爾流光照於侶禪師戶侶時怪光盛出戶觀見二人向布房中不知是聖人也旦往述之恰然符合言已端坐而化有見鬼者望見幡華滿寺光明騰焰不測其故入山視之乃見布公去世也以陳禎

明元年十一月二十三日卒於本住春秋七十有餘

唐潤州攝山栖霞寺釋智聰未詳何人昔住揚州白馬寺後度江住揚州安樂寺大業既崩思歸無計隱江荻中誦法華經七日不饑恒有虎遶之而已不食已經數日聰曰吾命須臾卿須可食虎忽發言曰造天立地無有此理忽有一翁年可八十腋下挾船翁曰師欲度江至栖霞寺住者可即上船四虎一時目中淚出聰曰救危扶難正在今日可迎四虎於是利涉往達南岸船及

老人不知所在聽領四虎同往栖霞舍利塔西徑行坐
禪誓不寢卧衆徒八十咸不出院若有凶事一虎入寺
大聲告衆由此驚悟每以恒式至貞觀二十三年四月
八日小食訖往止觀寺與衆辭別還本房安坐而卒異
香充溢丹陽一郭年九十九矣

右此四驗出
唐高僧傳

唐武德初中有醴泉縣人姓徐名善才一生已來常修
齋戒誦念觀世音經過逾千遍每在京城延興寺元琬
律師所修營功德敬造一切經至武德二年十一月因

事還家道逢邊賊被捉將去至幽州南界賊性凶毒所
捉得漢數千人各被反縛將向洪崖差人次第殺之頭
落懸崖賢者見前皆殺定知不免唯念觀音剎那不輟
次到賢者初下刀時自見下刀及至斫時心不覺惺當
殺之時日始在申至於初夜覺身在深澗樹枝上坐去
岸三百餘步賢者便自私念我何故在此良久始知今
日被殺何因不死身全在樹便以手摩頂覺頂微痛而
無損傷即知由念觀音得全身命當時十五日天時月

朗其身無衣兼不得食縱由數日極覺飢寒旦漸下樹
循澗東行二里於其澗內拾得一領羊裘及得一量鞋
靸得著免寒復行一里便得一盃桃棗青翠赤白似新
摘來可有升餘得食免飢自非觀音神力豈得仲冬得
新桃棗既免飢寒得充氣力漸上南坡到南岸上反顧
北看遙見賊營數里人畜聲聞猶未眠卧賢者雖到南
岸恐賊來趨望家急行可行五十里知賊漸遠身心寧
泰在一樹下歇息跣趺誦念身勞日久不覺坐息至於

四更忽寤開目見一青狼偉大向賢者前蹲坐將口挂
賢者鼻賢者見已還閉目作念云若實我讎願食我身
以償宿殃各捨怨結共發仁慈若是觀音願救弟子令
得安泰作此語已開眼觀視不見遺跡當知諸佛慈善
根力隨緣感現利益無窮今時有誦不得力者良由輕
心復由過現宿惡相資所以難感賢者平安到家并將
殘桃棗呈示道俗知實不虛

道年幼自見
琬師說之爾

法苑珠林卷八十二